



Volfgangus natus est patre Antonio doliaro, & matre Angela sexto id. Septemb. Anno 1497 in oppido Dusa, in finibus Germaniæ & Lotharingiæ sito, haud procul Tabernis Alsatia. Is cum felici ingenio esset præditus, à pueris operam literis tanta diligentia dedit, ut magis freno quàm calcaribus opus haberet, dum subinde primus & ultimus in schola existeret. Cum hoc modo rudimenta Grammatices didicisset, paruo uatico à parentibus dimittitur, ut in alijs scholis pergeret, & pro more eius seculi ostiatim cantado uictum sibi compararet. Itaq; primò Rapperschui lam in Alsatiam ueniens, ludum uisitauit, & ab e-

ius loci generosis comitibus plurima beneficia percepit. Erat autem tum celebris schola Selestadij. id cū intellexisset, sese eò contulit, & ludimoderatori ob præclaram indolem acceptissimus fuit, præsertim cum sonoram uocem haberet, atq; canendi artem mediocriter calleret. In eo loco ad 15 ætatis annum permansit atq; Poëtarum lectione plurimum delectatus fuit. Postea parētes inuisurus ex itinere in pago Lixheim, sub dominio Lützelstein in finibus Palatinatus, apud materteram Sophiam diuertit. Erat ibi celebre Benedictinorum monasterium. Itaq; cum uespertini cantiones instarent, Sophia hunc Vuolfgangum secum ad templum duxit, atq; cum alijs pueris canere iussit.